

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINSKI SUD U ZENICI
Broj: 43 0 St 243944 24 St
Zenica, 21.09.2026. godine

Općinski sud u Zenici, stečajni sudija Amela Sinanović, u stečajnom postupku nad INOX-METALL d.o.o., ul. Bilješavo bb, Kakanj, MBS: 43-01-0049-18, nakon skupštine povjerilaca održane dana 21.09.2026.godine u prisustvu stečajnog upravnika Begagić Jasmina iz Zenice, dana 21.09.2026.godine, donio je sljedeće:

R J E Š E N J E

Pozivaju se stečajni povjerioci, ako su zainteresovani za daljnje vođenje stečajnog postupka u situaciji kad stečajna masa nije dovoljna ni za pokrivanje troškova stečajnog postupka da predjme novčani iznos od 5.000,00 KM, za pokrivanje troškova stečajnog postupka, na depozitni račun ovog suda broj: 134-010-0000044837 otvoren kod IK Banke d. d. Zenica, u roku od 30 dana, te da po izvršenoj uplati sudu dostave uplatnicu, kao dokaz da je uplata izvršena.

Ako stečajni povjerioci ne predjme iznos naveden u stavu jedan ovog rješenja, u određenom roku u ovom rješenju, upozoravaju se da će sud zaključiti stečajni postupak zbog nedostatka stečajne mase koja nije dovoljna ni za pokriće troškova stečajnog postupka.

O b r a z l o ž e n j e

Rješenjem ovog suda broj 43 0 St 243944 24 St od 10.03.2025. godine otvoren je stečajni postupak nad INOX-METALL d.o.o., ul. Bilješavo bb, Kakanj, a dana 03.07.2025.godine održano je ispitno i izvještajno ročište, te je 04.07.2025. godine dana doneseno Rješenje o utvrđenim potraživanjima.

Podneskom od 30.07.2026.godine stečajni upravnik je predložio da se u skladu sa odredbama čl. 196 Zakona o stečaju zaključi stečajni postupak ako niko od zainteresovanih lica ne predjmi novčani iznos od 5.000,00 KM potreban za nastavak stečajnog postupka, budući da je izvršeno unovčavanje stečajne mase, te nema više imovine za pokriće troškova stečajnog postupka.

Shodno odredbama čl.196 st. 4. Zakona o stečaju ("Sl. novine FBiH" br. 53/2021), ovaj sud je zakazao skupštinu povjerilaca za dan 21.09.2026.godine, a koje Rješenje je objavljeno u Sl. novinama FBiH br. 73/26 od 16.09.2026.godine.

Na zakazanu skupštinu povjerilaca i pored uredne dostave poziva i rješenja o sazivanj nisu pristupili povjerioci.

Na skupštini je saslušan stečajni upravnik koji je izjavio da je nakon ispitnog i izvještajnog ročišta poduzeo radnje unovčavanja imovine , da su podnesene ukupno tri prijave potraživanja ukupne vrijednosti u iznosu od 21.619,69 KM te su svrstane u isplatne redove razlučno pravo prijava UIO u iznosu od 2.386,39 KM, viši isplatni red prijava KPU Zenica na ime doprinosa za zaposlenike iznos od 2.359,18 KM i opći isplatni red ukupan iznos od 16.874,10 KM (prijava KPU iznos od 15.781,19KM i BH Telekom d.d. iznos od 1.092,91 KM. U stečajnu masu

stečajnog dužnika uvrštena je imovina vozilo tm: Renault Traffic dCi i pokretne stvari printer i stolica. Na izvještajnom ročištu donesena je odluka da se imovina stečajnog dužnika prodaje neposrednom pogodbom. Predmetna imovina je prodana neposrednom pogodbom za ukupan iznos od 1.252,50 KM, a koja se prodaja odnosi na tmv Renault Traffic dCi u iznosu od 1.100,00 KM, te printer i radni sto za ukupan iznos od 152,50 KM. Troškovi stečajnog postupka određeni su Rješenjem ovog Suda od 21.08.2026.godine, i to troškovi stečajnog postupka od 239.50 KM i nagrada za rad stečajnog upravnika u iznosu od 1.698,00 KM. U odnosu na troškove stečajnog postupka isti se odnose na redovne troškove vođenja računa, troškovi taksi, izrade pečate i ostalih troškova. Predmetni troškovi zaključno sa današnjim danom iznose ukupno 147,10 KM, kako slijedi: vođenje transakcijskog račun, zaključno sa 31.08.2026.godine iznos od 60,00 KM, izrada pečata 35,10 KM, troškovi taksi 30,00 KM troškovi ovjere dokumentacije 22,00 KM. Od ostalih troškova isti se odnose na materijalne troškove prodaje tmv Renault Traffic, koje vozilo je bilo smješteno na adresi pravnog lica, Bilješevo bb. Za potrebe prodaje istog, obavljen je odlazak na adresu od strane stečajnog upravnika, ukupno tri odlaska (materijalni troškovi na relaciji Kakanj-Zenica) u vrijednosti 157,50 KM, te nagrada za rad stečajnog upravnika u bruto iznosu od 1.698,00 KM Iznos dobijen od prodaje pokretnih stvari u iznosu od 152,50 KM utrošen je na redovne troškove poslovanja kako je gore navedeno, uvećano za troškove vođenja i zatvaranja računa. Od iznosa prodaje tmv Renault Traffic, na koje vozilo je zabilježeno razlučno pravo po prijavi UINO, u skladu sa odredbom člana 168. Zakona o stečaju FBiH i odredbe čl.15. Pravilnika o naknadama i nagradama za rad stečajnog upravnika i članova odbora povjerenika bit će namireni troškovi prodaje istog u iznosu od 157,50 KM, a preostali iznos bit će utrošen za namirenje nagrade za rad stečajnog upravnika. Uzimajući u obzir sve gore navedeno, ukupni finansijski priliv sredstava iznosi 1.252,50 KM te nema druge imovine kojom bi se eventualno uvećala stečajna masa. Troškovi stečajnog postupka iznose ukupno 1.937,50 KM, uvećano za dodatne troškove taksi i zatvaranje transakcijskog računa. Iz navedenog slijedi da će od ostvarenih sredstava prodajom u skladu sa članom 15 stav 6 Pravilnika o naknadama i nagradi za rad stečajnog upravnika, samo djelimično biti namireni troškovi, dok će dio troškova ostati nenamiren u iznosu od 685,00 KM, uvećano za troškove vođenja transakcijskog računa do njegovog zatvaranja te troškove taksi dostavljanja finansijskih izvještaja. Kako je izvršena prodaja cjelokupne stečajne mase, te s obzirom da nema više bilo kakve imovine koja bi činila stečajnu masu, firma ne obavlja nikakvu djelatnost i nema sredstava niti stečajne mase za pokriće i redovnih troškova stečajnog postupka, da stečajni povjerioci nisu niti mogu biti niti djelimično namireni u ovom postupku, predlaže da se u skladu sa odredbama člana 196.Zakona o stečaju pozovu povjerioci da uplate iznos u iznosu od 5.000,00 KM za dalje vođenje stečajnog postupka, a ukoliko isiti ne uplate navedeni novčani iznos da sud otvori i zaključi stečajni postupak nad stečajnim dužnikom Inox Metall d.o.o. – u stečaju.

Kako iz Izvještaja, dostavljene dokumentacije, proizilazi da stečajni dužnik nema više imovine koja bi se mogla unovčiti i iz kojih bi se mogli finansirati troškovi stečajnog postupka, kako sadašnji stvarno nastali troškovi, tako ni budući troškovi stečajnog postupka, to jasno iz navedenog proističe da se nakon otvaranja stečajnog postupka ispostavilo da stečajna masa nije dovoljna ni za pokriće troškova stečajnog postupka.

Kako stečajni dužnik nema stečajne mase, pa ni za troškove stečajnog postupka, to je sud primjenom odredbe čl. 196. a u vezi sa čl. 102. stav 7. Zakona o stečaju i pozvao stečajne povjerioci da ako su zainteresovani da predjme dovoljan novčani iznos za pokrivanje troškova stečajnog postupka. Visina troškova srazmjerno je određena visini troškova koji se očekuju a koji su neophodno potrebni za dalje vođenje stečajnog postupku, a koje je shodno svom iskustvu, struci i znanju, predočio stečajni upravnik sudu.

Ako stečajni povjerioci ne predjme naloženi novčani iznos kod situacije kada se nakon otvaranja stečajnog postupka ispostavilo da stečajna masa nije dovoljna ni za pokriće troškova stečajnog postupka, stečajni sud će zaključiti postupka zbog nedostatka stečajne mase shodno odredbi čl. 196. stav 1. Zakona o stečaju.

PRAVNA POUKA;
Protiv ovog rješenja nije
dozvoljena žalba.

Stečajni sudija:
Amela Sinanović